

靖

海

志

靖海志卷一

海鹽彭孫貽昇仁氏著

丁卯明熹宗天啓七年

六月海寇鄭芝龍等犯閩山銅山中左等處芝龍泉州南安縣石井巡司人也或曰漳州府之漳鎮人芝龍父紹祖為泉州庫吏蔡善繼為泉州知府府治後街與庫隔一街相望芝龍時十歲歲投石子誤中善繼額善繼擒治之見其姿容秀麗笑曰法當貴而封遂釋之不數年芝龍為父所怒持棍逐之芝龍大恐與其弟芝虎奔

海上船乃懇巨商攜往海外芝龍姣媚嫵順音律何補  
靡不精好同抵日本日就島主宴飲歌舞時主室有女  
君悅之乃日本長崎上之族女即賜姓成功生母也再  
一年前艦復至乃附歸所娶所生姑留日本至中途爲  
海盜劫奪芝龍隻身隨艦貨作千金分與主寨之首領  
顧振泉海有十寨寨各爲主芝龍之主入主中主也傳  
半年主有疾疾且死九主爲之療祭芝龍乃泣而求其  
主曰明日祭後必會飲意欲求衆力爲我於一洋獲之  
有無多寡係我之命時緩言懇之主如言衆情允樂以

得四船貨物皆自暹羅來每艘分其半九主重信義盡  
畀之富逾十主矣海中以富爲尊主亦就俎芝龍升爲  
十寨中之一時則通家耗輦金還家置蘇杭兩京細軟  
寶玩興販琉球外國等物沿海州縣搶掠一空官兵莫  
能抗始議招撫以蔡善繼嘗有恩於芝龍因並移泉州  
道以書之芝龍感恩爲約降及受降之日善繼坐轅門  
令芝龍兄弟囚首自縛請命芝龍素德善繼屈意下之  
而芝虎一軍皆譁竟叛去天啓六年丙寅春遂據海島  
截商粟閩中漕饑望海米不至於是求食者多往歸之

七月奴商民船勢浸大其黨謀攻廣東海豐嶺頭村以爲穴十二月芝龍乃入閩泊於漳浦之白鎮巡撫朱一馮遣都司洪先春率舟師擊之而以把總許心素陳文魚爲策應鏖戰一日勝負未決會海潮夜生心素文魚船漂泊失道賊暗度上山詐爲鄉兵出先春後先春腹背受敵遂大敗身被數刃然芝龍故有求撫之意欲縱達於我兵乃舍先春不追獲盧游擊不殺人自舊鎮進至中左所總兵俞咨臯戰敗縱之歸中左人開城門求不殺芝龍約束麾下竟不侵擾警報至泉州知府王猷

知其詳乃曰芝龍不追不殺不焚掠似有歸命之意今  
勦難猝滅撫或可行不若遣人往諭退舟海外仍許立  
功贖罪有功之日優以爵秩興泉道鄧良知從之遣人  
諭意

戊辰 懷宗崇禎元年

春正月工科給事中顏繼祖劾福建總兵俞咨皋下獄  
初巡撫朱欽相招撫海寇楊六楊七等芝龍求返內地  
楊六給其金不為通遂流劫海上繼祖上言海盜鄭芝  
龍生長於泉聚徒數萬劫富施貧民不畏官而畏盜總

兵俞咨臯招撫之議實飽賊費舊撫朱欽相聽其收海盜楊六楊七以為用夫撫寇之後必散於原籍而咨臯招之海即置之海今日受撫明日為寇昨歲中左所之變楊六楊七杳然無蹤咨臯始縮舌無辭故閩帥不可不去也疏入逮咨臯下於理 三月禁漳泉人販海芝龍縱掠福建浙江海上 六月議招海寇鄭芝龍 九月鄭芝龍降於巡撫熊文燦工科給事中顏繼祖言芝龍既降當責其報效從之

己巳

崇禎二年

春二月海寇李魁奇伏誅魁奇本鄭芝龍同黨芝龍忌  
之擊斬粵中夏四月廣東副總兵陳廷對約鄭芝龍  
勦盜芝龍戰不利歸閩不數日寇大至犯中左所近港  
芝龍又敗寇夜薄中左所

辛未崇禎四年

春正月上召廷臣及各省監司於平臺問福建布政使  
吳勝陸之祺海寇備禦若何賜曰海寇與陸寇不同故  
權撫之但官兵狃撫為安賊又因撫益恣致數年未息  
上曰前撫李魁奇又何殺之賜曰魁奇非芝龍比即撫



終不為我用。今鍾斌雖撫亦反側不可保也。上問計將安出。之祺曰：海上官兵肯出死力，有司團練鄉兵多設火器以守為戰，勦之不難。上問巡撫熊文燦，曰：文燦才胆俱優，但視賊太易，故前有吉了之敗。之祺曰：鍾斌與鄭芝龍勢不兩立。七月間斌擾福州，撫臣計誘往泉州。前聞撫臣同芝龍討賊，俾其兄賊遁去。問廣東布政使陸問禮，對曰：廣東海寇俱自福建至，舟大而多火器，兵船難近，但守海門，勿令登陸，則不為害。

壬申崇禎五年

冬十一月海盜劉香老犯福建小埕游擊鄭芝龍擊走之

癸酉

崇禎六年

夏六月海盜劉香老犯長樂

甲戌

崇禎七年

夏四月海盜劉香老犯海豐 十二月總督兩廣熊文燦奏道將信賊自陷時文燦令守道洪雲蒸巡道康承祖叅將夏之本張一傑往潮州海角之道山調集徭獍蠻黎與土漢諸軍入海招降劉香老不三日香老詐降

兩道兩將皆被執入海上以賊渠受撫自當聽其輸誠  
豈有登舟往撫之理弛備長寇尚稱未知督臣節制何  
事命巡按御史確覈以聞已令文燦戴罪自效

乙亥崇禎八年

夏四月福建游擊鄭芝龍合粵兵擊劉香老於田尾遠  
洋初劉香老踰芝龍故轍仍為海邊患芝龍知其技力  
窘乏視風色之東西潮頭之上下窮逼迫擊幾無泊處  
香老恨已甚訪芝龍之在漳鎮選遣心膂直搗芝龍之  
室或殺或擒期了局以杜後患芝龍先知之假歡曰我

自就撫以來為貧官行走束縛正欲仍來入夥今眾  
來邀喜不可說即遣家眷行李登所來之船并錫鐵器  
械海中所需必欲取之市者無不席卷芝龍曰室中酒  
肉甚多何不暢飲啖空而去速令治具取精腍豐美者  
恣為飽啖後則數拳高歌更為碗酒埋肉極量忘懷海  
中來黨至醉極酩酊矣醉而酩酊者腰刀快斧咸掛於  
壁或眠或坐笑謔周顧芝龍陰伏兵於屋上忽鳴鑼一  
聲皆明盃明甲奮勇從屋跳下海中之黨或醉卧未起  
或解甲高歌皆砍殺無遺芝龍仍命舟中取上家口解

脫來人衣甲家丁披掛駕彼來船芝龍挺立桅下開船  
下海劉香老遙望本船與駕船服飾稍別再睨船前獨  
立果係芝龍大喜呼曰來矣芝龍拱手而應曰來矣立  
躍上岸乘其不備舉刀亂砍香老見勢威脅兵備道洪  
雲蒸出船止兵雲蒸大呼曰我矢死報國亟擊勿失遂  
遇害香老舉火自焚死精銳皆盡康承祖以老疾卒於  
海夏之木張一傑脫歸 八月香老家屬六十餘人部  
屬十餘人至黃華降於溫處叅軍

庚辰 崇禎十三年

秋八月加福建叅將鄭芝龍署總兵芝龍既俘劉香老  
捲其資蓄復來漳鎮其八主皆為芝龍勁旅從此海氛  
頗息通販洋貨內客外商皆用鄭氏旗號無倣無虞商  
賈有廿倍之利芝龍盡以海利交通朝貴寢以大顯  
癸未崇禎十六年

冬十一月設南贛兵三千以副總兵鄭鴻逵統之

甲申

崇禎十七年三月北京陷崇禎十七年三月北京陷崇禎十七年三月北京陷

世祖章皇帝順治元年福王即位南京

春正月兵科給事中曾應遴薦副總兵鄭鴻逵緩急可  
用詔益南贛兵三千命鴻逵鎮守五月十五日誠意

伯劉孔昭司禮監韓贊周等立福王即位南京改元宏光兵部尚書史可法請督師江北鳳陽總督馬士英入

專國政 封福建總兵官鄭芝龍為南安伯賜蟒衣

乙酉大清順治二年 宏光元年 五月南京破 宏光亡 閏六月唐王即位 福州改元 隆武

封鄭鴻達靖虜伯 左良玉下武昌破九江安慶至池

州時阮大鍼黃蜚屯板子磯鄭彩屯三山峽黃得功屯

蕪湖阮大鍼築壘板子磯小山上造二浮橋達北岸諸

軍俱艤舟磯下天大霧鄭彩溯江而上劫左營奪其舟

數十艘於紫沙洲梅根轉戰而前黃蜚嫉其功攔江不

聽彩艘下左兵追之礮擊彩舟傷百餘人殺四將領彩  
訟之朝蜚亦以彩越汎地邀功致敗互相訐奏朝命大  
鉞兩平之 大清兵既破揚州沿江窺渡鄭鴻逵率水  
師禦之京口 大清兵編筏張燈向鎮江而別由老鶴  
河渡 五月大清兵開開放舟蔽江而南鄭鴻逵鄭彩  
見之揚帆東遁大清兵渡江福王走至蕪湖為降將劉  
良佐擒解豫王 鄭鴻逵鄭彩守鎮江擁舟師不戰走  
還閩至浙於江口逢唐王鴻逵奉之至福州福建巡撫  
張肯堂巡按御史吳春枝禮部尚書黃道周南安伯鄭



芝龍等會議監國鴻逵固請正位以閏六月十五日即位改元隆武起曾櫻何吾騶等入閣辦事晉封芝龍為平虜侯尋封平國公鴻逵為定虜侯尋封定國公芝豹為澄濟伯鄭彩為永勝伯賜芝龍長子森國姓名成功封忠孝伯賜姓以天啟甲子年七月十五日生於日本母顏氏出也芝龍後遣人將母子取回又封芝龍部將施天福為武毅伯洪旭為忠振伯林習山忠定伯張進忠匡伯陳輝忠靖伯鴻逵部將陳豹為忠勇侯林察為輔明侯八月隆武詔至粵西有靖江王稱監國不

奉詔總制丁魁楚巡撫瞿式耜檄送至閩斬之 十月  
芝龍集廷臣議戰守宜自饒霞關外當守者共一百餘  
處其戰兵以元年冬操練二年春出關一支出浙東一  
支出江右界計兵共二十萬合八閩兩粵餉計之不支  
一年鄭芝龍遣給事中梁應奇往督因叅遲誤者數十  
人俱奉旨提問然遊疑未有提至者潮州知府楊球欲  
入朝聞旨遂止粵界不敢入 芝龍又令撫按以下皆  
捐俸助餉官助之外有紳助紳助之外有大戶助又借  
徵次年錢糧又搜括府縣庫積存銀厘毫皆解不足又

鬻官爵部司價銀三百兩後減至百兩武割僅數十兩  
或數兩娼優斷絲畫列衣冠但無俸無衙門空銜而已  
然借此倩軒蓋僱僕役拜謁官府鞭撻鄰里甚至府縣  
莅訟兩造皆稱官職立語不跪互毆於庭而莫可制  
鄭芝龍所招開門兵不過數百疲瘁廷臣請出關者章  
滿公車 隆武每欲躬履行關而芝龍但以缺餉為辭  
十月隆武未有嗣芝龍令子鄭森入侍隆武意有所  
屬先賜國姓改名成功成功輒先得以告芝龍由是廷  
無敢異用者芝龍鴻遠自恃有爰立功驕蹇庶禮辱王

嘗賜宴大臣芝龍以侯爵位輔臣上大學士黃道周引  
祖制武臣無班文臣右者固爭之遂首道周芝龍怏怏  
不悅諸生有佞芝龍者上書言道周迂腐非宰相才唐  
王怒敕督學御史杖之芝龍又薦其門下士朱作楫為  
吏科給事中葉正發為戶部主事皆不允以是益懷怨  
望唐王行郊天禮於南郊二鄭皆稱疾不出戶部尚書  
何楷劾奏郊天大典芝龍鴻逵不出陪祭無人臣禮當  
正其罪唐王賞楷有風裁即日令掌都御史事已而鴻  
逵揮扇殿上楷呵止之二鄭益怒楷知不為所容亟請

告唐王欲曲全之允其回籍俟再召楷至中途盜截其  
一耳以去抵家未久死蓋芝龍令部曲楊耿害之也

兵科給事中劉中藻亦以忤鄭氏去 有密告芝龍  
攬權者隆武輒責芝龍芝龍怒佯欲謝事隆武心知芝  
龍不可恃無以制之因復固留曰此非朕意乃某人言  
也芝龍潛中傷之於是左右無一同心矣 廷臣屢請  
命芝龍出關芝龍亦知不出關無以服衆心因分兵為  
二聲言萬人實不滿千以鄭鴻逵為大元帥出浙東鄭  
彩為副元帥出江西隆武做淮陰故事築壇郊拜而送

之二帥既出關，疏稱餉不行，逗遛月餘。隆武下詔切責曰：倘畏縮不前，自有國法在。二帥不得已，踰關行四五百里，仍疏言餉絕，留住如故。大學士黃道周憤師不前，因請以募兵江西，以江西多其門生子弟也。隆武命芝龍與之資，芝龍不予一錢。隆武給空札百函為行資。道周以劄聯絡忠義，糾合鄉勇得九千人，駐廣信。與楊廷麟萬元吉相應，出兵金衢。前後斬級數百，適衢撫與議不合，忌其師屯境上，密疏其短。道周不知也。繼而請兵請餉，絕不一應。及其知其由，遂決意長驅深入，婺源出

徽婁源令其門人也北帥張天祿執令妻子命令設計  
誘道周至明堂里執之并從軍主事趙士超中書毛元  
冰蔡時培賴叔儒俱送南京不屈見殺時閣臣蔣德  
璟自請行關相機督戰隆武許之比至則疲兵弱卒朽  
甲鈍戈無一可為因歎息告病去鄭遵謙起兵江上  
與張國維陳函輝熊汝霖等迎魯王於台州監國駐紹  
興遣都督陳謙奉書至閩久住衢州持兩端云魯王已  
封芝龍靖鹵侯欲以此邀封於唐王唐王數芝龍取其  
侯印為驗謙賈印唐王即召入閩督函稱皇叔父不稱

陛下隆武大怒御史錢邦芑劾其久住三衢徘徊閩浙之界自以舉足左右足為重輕因欲要取侯封以閩要浙以浙要閩祇恃搆聞之謀敢行挾制之術又歷數其在衢奸淫不法狀遂下之獄謙武進人乙酉春齊宏先詔封芝龍南安伯比請券誤書安南謙謂芝龍曰南安僅一邑安南則兼兩廣請留券易詔厚贈而別及半途而南京變謙遂留閩芝龍德之故力為申救行賄五千金於邦芑請免謙死邦芑懼以聞於唐王遂決意殺之即命邦芑鑿刑芝龍聞之過市命且停刑亟入朝見唐



王請以官贖諫死。唐王審敕行刑。故與芝龍久語慰勞之。過期芝龍出而諫已斬矣。芝龍伏屍出極哀。以千金厚殮之。從此益懷異志。先是芝龍鴻遠已密遣人通內院洪承疇御史黃熙允。及聞錢唐信息。因疏稱海寇狎。至今三閩餉取之。臣臣取之海。無海則無家。非遠征不可。拜表即行。隆武手敕留之曰。先生稍遲。朕與先生同行。使奉敕至河。而芝龍飛帆已過延平矣。芝龍既去。守關將施福聲言缺餉。盡撤兵還海。僊霞嶺二百里間。空無一兵。惟所遣守關主事及內臣之員偵探兵信以

聞耳

丙戌 順治三年 隆武二年

二月江楚迎駕疏相繼而至唐王遂決意幸贛與湖南  
為聲援芝龍欲扶君以自重固請回天興命軍民數萬  
人遮道號呼擁駕不得行乃駐蹕延平芝龍初以海寇  
受撫雖晉爵五等與地方有司不相統屬閩士大夫輒  
呼之為賊絕不與通及擁戴唐王即位芝龍位益尊權  
益重全閩兵馬錢糧皆領於芝龍兄弟是芝龍以虛名  
奉君而君以全閩予芝龍也故芝龍不肯聽唐王出關

思長有閩也 三月大清貝勒王駐兵錢唐北岸五月  
江上師潰六月初一日大清兵渡江江潮不至方國安  
馬士英欲獻監國為投降計遣人守監國守者忽病乃  
得脫遂上海船避入舟山督師張國維與國公王之仁  
兵部侍郎陳函輝大學士朱大典俱死之方逢年方國  
婁及刑部尚書蘇壯俱薙髮投誠馬士英既大鉞猶擁  
殘兵數千請入閩隆武以其罪大不許士英前後七疏  
自理有李遂者士英私人也與唐王有舊竊疏言士英  
有治兵才與阮大鉞皆宜在使過之列唐王特允士英

以青衣視事戴罪立功但無錢糧兵馬專任士英計窮  
逃至天台山寺為僧為大兵搜獲阮大鍼迎降貝勒俱  
令隨內府辦事大兵過順昌獲龍扛搜之得馬士英  
阮大鍼方國安父子及方逢年連名請駕出關為內應  
疏在已降後大鍼方遊山聞信知不免自投崖死仍命  
戮屍士英等四人俱斬於延平城下家眷百餘口悉給  
賜兵丁時杉關守將陳秀陳曦投降而僊霞嶺無一守  
兵寂如也大兵過延平而東時隆武定計入贛已至  
汀州見兵未至因停一日曬龍鳳衣忽有數十騎叩城

曰我扈蹕兵也門者納之陳謙之子追至直入行宮遂及於難 九月大兵入泉州德化知縣陳光晉迎降

既而汀漳皆陷惟鄭芝龍退保安平軍容烜赫戰艦齊備礮聲不絕響振天地樓船尚五百艘因前通洪承疇信未得達故不敢迎降乃使人言其撤兵不守以待大兵之至有功當得大用貝勒知前紳郭必昌與芝龍有舊因遣招之芝龍曰我非不欲忠於大清恐以立唐王為罪耳會大清固山兵逼安平芝龍怒曰既招我何相逼也貝勒聞之乃切責固山令離安平三十里駐軍別

遣內員二人持書至安平書畧曰吾所以重將軍者以將軍能擁立也人臣事主苟有可為必竭其力力盡不勝天則投明而事乘時建功此豪傑事也若將軍不輔立吾何以用將軍哉且兩粵未平命鑄閩粵總督印以相待吾欲見將軍者欲商地方人材及取兩廣事宜也芝龍得書大悅劫衆議降諸將多不欲有周鶴芝者以死諫不聽其弟鴻逵芝虎皆勸芝龍入海曰魚不可脫於淵芝龍不從其子成功涕泣力諫芝龍不聽於十一月十五日至福州朝見貝勒握手甚歡折箭為誓芝龍

益喜命酒痛飲賂遺不可勝計飲至三日夜半忽拔營起遂挾之北去至京封同安侯閩事畧定貝勒將歸邀芝龍送之貝勒過芝龍舟每進一食必加贊歎見一人必加褒獎信宿乃去芝龍過舟報謁貝勒疑之曰我所用人粗悍鹵莽何足當公意命悉取芝龍舟中庖厨僕從來供飲食侍左右芝龍乃大喜不知墮其術中也留信宿已出闕乃謂芝龍曰公功高同我入京一見天子何如芝龍以未宿戒辭曰公之左右僕從悉在此矣豈憂無行李費命取二萬金置舟中令從行者五百人皆

拘置別營不可相見對面作家書數行但稱本朝恩德  
囑其家世世無忘己又曰北上面君是我本願但子弟  
擁兵海上素非馴良脫有不測我且奈何貝勒曰即有  
之無與公事且亦非吾慮所及也芝龍既降其家人以  
為可免暴掠遂不設備貝勒至安平亂兵大肆淫掠成  
功母亦被淫自縊死成功大憤剖其母腹出腸滌穢重  
納之以殮發喪後遂起兵

丁亥

順治四年  
永歷

隆武亡是歲桂王即位於肇慶改元

初芝龍撤兵塞謝成功欲與俱見貝勒成功不從鴻逵



陰令逸去。至是率所部入海。芝豹獨奉母居安平鎮。鄭  
彩率舟師至舟山。迎監國魯王南下。魯王封鄭彩為建  
威侯。尋晉建國公。其弟鄭聯為定遠伯。尋晉侯。鄭彩及  
閣部熊汝霖進取福寧州。諸縣響應。遂入興化府。熊閣  
部鼓舞義兵。諸起義者皆來給割。兵至數萬。然多烏合。  
鄭彩謂奪其權。雖與之結婚。忌之。乘夜遣兵攻其舟。并  
全家殺之。於是義兵憤怨解體。時義兵所在。遂起汀邵  
並亂。據建寧。閩。鄒。為阻。是夏中朝命三大人陳錦。佟國  
器。李率。奉督兵至。破建寧。屠之。所失州縣盡復。鄭彩至

海壇復為鄉兵所敗遂同魯王至厦門時鄭聯亦糾合  
浦南梅義兵楊重等攻入漳浦縣以洪有禎為縣令未  
幾縣破有禎被執不屈遂高鄭聯率義兵攻海澄縣然  
見敵騎即走爭舟墜水死者甚眾平和縣曾慶等與詔  
安等處義兵立德化王慈煒據將軍寨隔大田攻順義  
將樂然皆為大兵所敗 初隆武之亡也舊相蘇觀生  
何吾騶俱遁回廣東與布政使顧元鏡於十一月立唐  
王弟粵錫監國改元紹武十二月大清總兵李成棟率  
兵襲廣成副將杜永和獲紹武并周王益王遼王盡斬

之蘇觀生從死吾駟元鏡皆降福建既陷兩廣總制丁  
魁楚與廣西巡撫瞿式耜會議監國式耜首為言永明  
王賢且為神宗嫡孫應立王諱由榔桂王之子初封衡  
陽以寇亂徙梧州會桂王薨王以衰經於十月十四日  
監國改元永歷以肇慶府署為行宮丁魁楚呂大器為  
大學士式耜以吏部侍郎兼閣學掌銓事封總兵陳邦  
傳為恩恩侯尋晉廣國公後廣西破投誠率兵追永歷  
為李定國所擒父子俱死時成功往南澳募兵而兵  
將戰艦百無一備聞永明王自立粵西遙奉永歷年號

稱招討大將軍罪臣以衆三百人泊於廈門之鼓浪嶼  
訓練即今中左所也浯州者金門也委黃愷於安平鎮  
措餉芝龍舊將咸歸心焉 七月成功以洪政陳輝為  
左右先鋒楊才張進為親丁鎮郭泰余寬為左右鎮林  
習山為樓船鎮入寇海澄扎營祖山頭數日援兵至洪  
政中流矢與監軍楊期潢俱被殺不克而還 八月與  
鄭鴻逵合兵圍泉州列營桃花山大清提督趙國佐率  
數百騎衝之張進楊才逆戰鴻逵遣林順等夾擊大勝  
之別遣水兵破溜石礮城我叅將解應龍死之軍聲大

振泉紳郭必昌之子顯欲內應國佐殺之滅其家九月我副我王進自漳來援成功解圍走

戊子順治五年 永歷二年

閏三月成功攻同安守將廉郎知縣張致齡遁入之

復寇泉州 七月陳錦修國器李率泰後之成功乃退

大兵屠同安鄭氏鎮將邱晉林壯猷知縣葉翼雲教諭

陳鼎咸被殺凡死者五萬餘人同安血流溝澗庶島

同之諸生陳姓緯歸流歸自省回至羅漢山中所謂生

閩雖若校以片紙云泥猷死半途同安血流溝澗嘉禾

人樓安平成平埔陳生果至小盈類而平是後凡渡溝

兵和斷學放回以應之然後永安海城竟毀折而廈門

光遠空無人  
歷一紀云  
是歲大饑成功及建國公鄭彩各發兵民  
船至高州糴米高州為恩恩侯陳邦傳所轄成功船免  
餉餘照丈尺徵餉船有千餘多是民船斗米閩中近千  
錢也時成功將士分駐各島監國魯王別將平夷侯周  
崔芝閩安侯周瑞定西伯張名振總兵阮美等守舟山  
之沙埕鄭彩鄭聯等守廈門金門鄭鴻逵守安平之白  
沙使其將陳豹守南澳成功泊廈門以親丁三百人遣  
其叔錦衣尉鄭芝鵬護家眷使張進守銅山所太子太  
師鄭香守海澄港之石尾有衆數千人後為大兵所敗

二子鄭廣鄭海死焉。然糧餉缺乏，取之民間，而鄭彩營將章雲京等擾民猶甚。鄭鴻遠遂率舟師至潮州，隨地取餉。

己丑 順治六年 永歷三年

廣東提督李成棟反叛，迎永歷。於是永歷有詔使至，以爲恢復在即，詔各勲鎮考試諸生，赴廣省入場。成功遂考送生員葉后，詔洪初闢等十數人，令黃志高齎疏赴廣。舟至潮陽，遭風飄壞，餘人不得達。獨黃志高至粵，詔以志高爲兵部職方司主事，使監成功軍，命以舟師直

取南都其後成功入寇長江承此詔旨也詔使并齎秦王孫可望告示一張其文云秦王告諭天下中間叙湖廣敬謹王四川殺八固山之捷入滇擒逆黔父子云云又檄文一冊中有云恢復兩京者准封為公一省者封為侯四府以上者封為伯今有無尺寸之功而擅封五等之爵云云又定西王李定國告示一張其文云西軍王奉秦王令旨中間叙破廣西定南王孔有德焚死之捷云云三月成功遣施琅楊才黃廷何宸樞等寇漳浦副將王起偉密赴納欵謀洩棄家由龜鎮至銅山投



見成功授偽都督同知掛統練軍門印令管北標將

十月成功舟進雲霄港由白塔登岸分道並進雲霄守將張國柱迎戰為左先鋒下偽副將施顯所殺遂攻城  
中軍姚國泰拒守城陷國泰重傷成功獲之令醫調治  
送軍前效用進抵詔安扎營龍峯磁窰等處令中衝鎮  
何震樞左衝鎮黃廷右衝鎮林習山等守盤陀嶺以遏  
漳援漳鎮王邦俊副將王之剛調募各州縣守兵合攻  
盤陀嶺是日大霧海師咫尺不辨何宸樞及其弟中軍  
宸梅俱戰死十一月成功解詔安圍督兵由分水關

入潮州。扼黃崗。時潮屬多土豪擁據。三河壩有吳六奇。黃崗有黃海如。南洋有許龍。澄海有楊廣。海山有朱堯。潮陽有張禮。碣石有蘇利。時武毅伯施天福來見成功。黃海如亦至。海如說成功取潮陽縣。資其富饒。止近海口。有海門。所達濠埔。可以拋泊。海艘通運糧米。但須由南洋。鯊澳。逆達濠埔。方可至縣。恐許龍張禮為梗。爾成功遂令移兵南洋。許龍逆戰。敗走。漢陽。舊時陳斌來歸。偽授後勁鎮。楊廣朱堯唐玉各迎降。遂移兵鯊澳。張禮拒命。立破其達濠霞美二寨。進攻青林寨。張禮乞降。准。

其歸命遣援勦右鎮黃山督諸軍往靖海衛并巡下惠  
來縣以中軍汪漣之理縣事正兵營盧爵守城黃山等  
回攻南山寨破之成功遂移兵入揭陽會鄭鴻逵并帶  
張禮往見成功忽夜沈之水成功甚悔之

庚寅順治七年 永歷四年

先是大清兵破湘潭何騰蛟死之破南昌金聲垣死之  
二月破信豐李成棟歿於陣永歷皆追贈王爵枝淚親  
祭及報南雄不守遂移德慶抵梧州榕江兵潰桂林陷  
翟式耜張同厥俱死之 三月成功入潮陽知縣常鼎

風率父老郊迎成功令三鎮洪旭駐鎮徵輸轉運楊才  
攻破平和寨屠之陳斌克獅頭寨寨首黃亮采請降許  
之右先鋒楊才病故以正總班林勇為右先鋒後征蘇  
利陣亡以甘輝管親丁鎮黃廷管右先鋒鎮施顯管援  
勦左鎮以監督王秀奇為戎鎮旗管親隨兵以林勝為  
中協陳瑞為右協 四月成功移師揭陽鴻逵言新墟  
寨負固不服合兵攻之用龍煩擊其城遂乞降門關海  
郭鴻逵令人設水撈起得大銃夾兩龍為耳用船車出  
之號龍耳煩所擊無不摧破後劉國軒用以攻泉城火  
引不發瓶之口守潮州新泰伯郝尚久率步騎數千來

援成功揮諸將迎擊陳斌躍馬入陣擒我中軍陳祿諸軍繼進斬首數千尚久僅以身免五月詔安九甲義將萬禮等來附施琅所招也六月引兵攻蘇利不克利據碣石衛叛復平南王發兵攻殺之成功諭諸將議攻潮州陳斌進曰潮郡東南環溪通漳大路只一浮橋必須斷橋以絕援兵然後移札西南攻圍之十全必克成功從之初一交戰尚久大敗浮橋并石橋一齊焚燬隨移師攻城三面圍之尚久閉城不出遣人乞援於漳郝文興來援許龍渡之入城尚久削髮歸我朝城守益

堅成功久攻不下。又天暑士卒多病，乃解圍退屯潮陽。黃亮采等復叛，攻襲行營。甘輝逆擊，斬其父子，始散去。鄭彩、鄭聯屯廈門，與芝鵬有隙。成功用施琅之策，以米千石餉鄭聯，欲襲取之。鄭彩曰：「是毒藥也，宜全軍出避。」聯不從。聯建生祠於萬石巖，十五夜宴轄下諸將。二鼓後，成功將至，盡收其戰艦兵卒。其將陳倅蓋行、吳豪等皆歸。成功成功撥親隨兵守其衙，後月餘，芝鵬說成功置酒萬石巖，夜歸伏甲於路。殺之時，鄭彩以舟師百餘艘逃於廣東南海之間。成功遣人往請，回島不遇而

還其部將楊朝棟王勝楊權蔡新等來見成功以朝棟  
為義武營王勝等管水師舊將藍登來見授援勦後鎮  
彩飄泊數載士卒星散成功以書招之遂回後病死於  
島 山寇攻陶惠來縣知縣汪滙之守將盧爵俱死之  
三鎮洪旭報潮陽山陽復起不復追徵成功以閩安侯  
周瑞為水師右軍掛印黃大振為援勦前鎮命鄭芝鵬  
鎮守廈門既引何德管水師藍登管陸師 十一月成  
功至潮陽提塘黃文自廣至報請成功入援我平南王  
尚可喜靖南王耿繼茂率滿漢數萬下廣州粵西望成

功南下會兵甚切閏十一月成功傳令各鎮齊備船隻  
而下勤王時陳斌與施琅相抗不睦帶兵而遁後據潮  
州歸命黃海如在達濠浦欲逃成功令林習山致之死  
十二月守將杜永和奔瓊州王師下廣成功扼揭陽與  
鄭鴻逵議往接之

辛卯 順治八年 永歷五年

正月成功至南澳施琅進曰勤王臣子職分但琅昨夜  
一夢似大不祥乞藩主思之成功默然遂令將左先鋒  
卽奔戰士委副將蘇茂管轄鄭鴻逵送蕭拱宸沈奇等



赴軍前効用成功以拱宸為中衛鎮沈奇為護衛右鎮  
隨師南下鄭鴻達同洪旭施琅帶陳璘鄭文星等回島  
二月成功至白沙河颶風大作各船飄至鹽州港成  
功正副坐船風大不得泊坐帆溜下幾覆數次天明方  
霽後陞管中軍船蔡進福為水師內司鎮管副中軍船  
施鼎為水師後鎮 三月成功至大星所殺退惠州援  
兵遂攻城下之我閩撫張學聖急調提督馬得功集同  
安縣十八堡劉五店各處民兵及船攻廈門偽守將鄭  
芝鵬乘舟遁禁城中居民不許搬移得功數十騎下船

飄至五次始登岸無有禦之者守高崎水師鎮阮引不  
戰而走城中百姓哭聲振天成功董夫人倉皇抱木主  
至海口不得船廈門港居民林禮樂始於舟中負登小  
舟至芝鵬大船其夜亂兵焚燬廬舍火光竟天前文淵  
閣大學士吏部尚書曾櫻在城中家人請振之出城櫻  
曰此一片清靜地正我死所去將何之是夜自縊於所  
居樓上時為二月十三日越三日公之門人阮旻錫入  
城尋母遇公隣居藍姓者在西門外詢之藍曰公不肯  
出城是晚某進粥一盂公不食及曉再候之公已自盡

矣無人可收殮也時已昏黑不得入城是錫往尋僧文  
台又至東嶽廟尋公之門人陳泰共議天未明文台以  
僧龕同陳泰擡公尸至寧厝灣下船付其家人鄉紳憲  
副王公忠孝以壽棺貯之司馬盧若騰副阮沈佺期樞  
部諸曹倬等皆視殮後兵部主事劉玉龍疏陳輔臣從  
容就義事永歷下詔曰曾樓身死綱常允宜優恤追贈  
光祿大夫上柱國太師謚文忠賜祭葬蔭一子中書科  
舍人一子錦衣衛百戶世襲其門人知縣陳泰冒險負  
屍積勞殞沒者贈鴻臚寺卿 三月初一日大清巡撫

張學聖同興泉道黃澍渡海見島嶼孤懸波濤環遶驚  
為絕地爭先引回令知縣張效齡安撫居民初四日馬  
得功行牌於各鄉安民意欲據守初八日會鄭鴻逵舟  
師至截港圍之命鎮將楊抒素登圓靈港與戰有勝負  
副將吳敦戰死施琅率陳璘鄭文星百餘人登廈門港  
與戰大敗之幾獲得功於是得功求過海巡撫張學聖  
遣人至安平乞和於鄭芝龍之母囑鴻逵以船送馬得  
功步騎三百及餘兵盡回先是鴻逵遣都督鄭德翼將  
周全斌等至大星所報稱馬得功攻島請成功回師成

功於四月初一日到浯嶼得功已渡海二日矣成功怒甚不許親戚與鴻達相見鴻達移屯白沙初十日成功駐廈門港議失守功罪先賞施琅花紅銀二百兩陳璘一百兩斬鄭芝鵬阮引等以徇何德網責藍登免罪軍士皆踴躍歡呼銳氣百倍以將士家在島上遭鄭阮等搶掠得洩其忿故耳成功命忠振伯洪旭管理中左叅軍潘庚鍾追各紳士助餉需加派各戶搜掠一空詔安平和二縣復降於鄭氏定西侯張名振平彝侯周崔芝英義伯阮駿等自舟山至成功各授水師鎮海澄

守將郝文興密約約款

靖海志卷一

靖海志卷二

海鹽彭孫貽昇仁氏著

壬辰順治九年 永歷六年

正月初二日成功督師至海澄港潮水大漲直至中權  
關下郝文興開城率將士出降授前鋒鎮掛印以叅軍  
黃維璟知縣事 初十日成功進兵江東遣各鎮攻長  
泰縣至溪西擊敗漳州援兵廿三日援兵再至復敗之  
二月初二日遊兵營吳世珍奮勇登城被燬燒死成  
功令火器營何明築地道用地雷以擊之城 三月初



四日大清總督陳錦督步騎數萬來援長泰扎營同安  
初十日早地雷發不及城而止陳錦按兵不進是日遵  
移兵扎江東初十日陳錦安營於牛蹄山相去五里十  
三日親率諸軍出戰成功命諸將擊之錦大敗棄營  
而走全軍俱覆喪夫衣甲馬足輜重不可勝計遵奔回  
扎營同安城外後為家丁庫成棟所刺降於成功成功  
賞之以其弑主陰令殺之我長泰縣守將楊青棄城走  
成功以恭軍馮澄世知縣事以甘輝為中提督黃廷為  
前提督黃山為後提督 四月進圍漳城成功扎營南

院

五月大清浙鎮馬進賢

號金備馬

率兵援漳屯東門同

王邦彥分道出戰兵敗還城遂嬰城固守不敢出成功  
圍之數月不下以張名振管地方事陞協將萬禮為前  
衝鎮副將陳朝為後衝鎮成功移師金門後浦扎營操  
練施琅全在南澳兵付蘇茂代將意曰日必復任成功  
既不與遂請為僧成功諭令再募兵許授前鋒鎮施琅  
偶有親兵曾德逃亡成功拔為親隨琅擒回立斬之成  
功怒而不發二十日傳令諸將在船聽令出軍陰令右  
先鋒黃廷執施琅交忠定伯林習山囚於船中令副將

吳芳看守琅家人著人詐稱成功令箭取回審究吳芳  
即同登岸至草灣琅將吳芳及押人打倒脫走逃匿山  
穴中兩晝夜投蘇茂茂密以小舟渡海依澄霽伯鄭芝  
豹成功怒欲斬林習山未果殺吳芳妻子令芳追尋二  
十一日殺施琅之父及其弟施顯以戎旗中協林勝為  
援勦左鎮二十二日成功督兵入漳州境二十七日大  
破漳鎮王邦俊之兵於磁窰六月回師將黃興來降  
授中權鎮黃格來降授副將以監督陳六御為北鎮常  
騎兵 五月福建集舟師數百艘進攻廈門成功令陳

陳輝督水師禦之戰於崇武所聞兵大敗棄船登岸而走九月成功督師入漳浦境漳鎮王邦俊來援復大破之追至龍井降其部下數百人而還李長病篤以黃昌為戎旗親隨營大清固山金勵統浙直滿漢兵萬餘人入閩來援至泉州駐紮養馬二十六日成功解圍退扎古縣據險以待固山由長泰入漳十月初三日固山率滿騎衝營是早西北風盛發火箭火礮被風打回對面咫尺不見滿兵乘煙衝突海師潰散成功退扎海澄後提督黃山禮武鎮陳俸右先鎮廖敬親丁鎮郭

廷護衛右鎮洪承寵皆戰歿 十一月大清提督楊名  
高自福州率步騎入漳應援成功逆之於小盈嶺大破  
之追至馬厝港名高僅以身免成功以騎兵營楊祖有  
功挂印陞營為鎮 十二月舊將陳堯策先投大清同  
我將協守漳浦至是獻城納降成功以為護衛前鎮照  
舊鎮守以叅軍林其昌知縣事議築鎮門象鼻山截溪  
流不得入海欲以灌城而奔流迅急堤不得合費工甚  
鉅罷之 成功不攻城築長圍困之使其糧盡自降而  
城中兵盡括鄉紳富戶及百姓粟食之粟盡民相枕藉

餓死殺人為食有父食子兄食弟妻食夫至於婦人孳  
聚殺男子分食之者毋論鼠雀至樹根木葉水萍牛羊  
馬皮之屬盡食之稀粥一碗直四金自四月至十月城  
中死者十七八後大清署守道周亮工收髑髏凡七十  
三萬有奇焚埋於東門外名曰同歸所築萬善庵其上  
勒石記之城外死者骨骸無數不與焉

癸巳

順治十年

永歷七年

三月成功駐廈門遣前軍定西侯張名振等率水師寇  
浙直州縣并遣忠靖伯陳輝等一齊進入長江 四月

金固山調集水陸官兵船隻欲攻海澄成功即遣水師  
左軍林察右軍周瑞後軍周崔芝阮駿黃大振等前往  
堵截後遇颶風林察漂入興化港被獲至鄭賈來議撫  
始放回 二十八日金固山扎營祖山頭 五月初一  
日成功至海澄調兵守禦以前鋒鎮郝文興戎旗鎮王  
秀竒護衛前鎮陳堯策守鎮遠寨前衝鎮萬禮守鎮遠  
寨外以前提督黃廷中提督甘輝守關帝廟前木柵連  
接鎮遠寨成功駐扎天妃宮親行督戰 初四日金固  
山率馬步數萬扎營天妃宮前巨礮火箭並發晝夜不

絕木柵燒壞海兵多死傷山積 初五日後勁鎮陳明  
後衝鎮葉章各率精勇數百合力擊之遇礮銃齊發葉  
章被礮打死陳魁打傷右足成功今收兵固守以周全  
斌管後衝鎮楊正管後勁鎮大清兵連攻兩晝夜海兵  
營壘隨築隨壞成功率諸將登敵臺觀望張蓋而坐滿  
兵見之礮矢齊發甘輝翼成功下臺座位隨擊碎矣鎮  
遠寨邊新築邊寨崩壞如平地軍士無可站立成功今  
神器鎮何明率洪善掘地河溝邊夜埋火藥無數藥心  
相續候令而發初六日黃昏滿兵礮銃並放連夜不絕



至五鼓火藥盡放空礮以向城頭疊綠旗兵二疊滿  
兵填濠攀柵而上兵皆重鎧及不能傷城上俱持大斧  
擊之皆墮地外兵乘其屍而登三疊滿將蜂擁齊進賊  
不可當天色漸明滿兵過河已大半成功遂暗發地礮  
煙焰蔽天過河者盡被礮擊死其未過河者甘輝截擊  
之擒斬無算金固山夜遁十二日成功回廈門大犒  
將士論功行賞以忠孝伯印付甘輝輝不敢受以禮讓  
海澄城殺知縣黃維環及不用命軍士二人三月差  
監督池士紳以蠟丸齎帛疏由陸路詣廣叙方曲破總

鎮王邦俊小益精破提督楊名高江東橋城總督部院  
陳錦海澄敗回山金勵之功永歷遣兵主事事萬年英  
濟勅晉成功為漳國公封延平王成功拜衣辭讓差監  
督張自新同萬兵部由水路詣廣回奏以海澄戰功請  
封各鎮封爵後永歷以帛詔封甘輝為崇明伯黃廷為  
永安伯黃禮為建安伯郝文興為祥符伯王秀奇為慶  
都伯叅軍馮澄世為太僕寺卿兼都察院右僉都御史  
四月築海澄城所屬地方每家各出民夫一名城高  
二丈餘舊有五都土城連而為一皆用灰石砌成并築

短牆安大小銃三千餘號周圍環以港水巨濠茫茫外  
遊舟楫內積軍器糧草據漳州之咽喉與厦金二門相  
為表裏以為長守計命馮澄世督其工 六月成功以  
金固山回京遂督舟師南下進攻鷓汀壩鷓汀在潮州  
港口其民強悍有船百餘隻加十八槳水上如飛遇大  
船以繩絆其舵牽之入港小船即攻殺之海舟至潮皆  
被其劫掠殺害甚多成功至攻其城楊廣亦以兵來會  
城厚而堅自辰至午攻打不下成功放飛彈微傷足蹠  
遂退兵次日至華平青嶼寨人納款遂抽兵下船時李

定國遣人致書其書曰西寧王致書國姓大將軍麾下  
言當戮力同心約以舟師直取江南也 同安侯鄭芝  
龍在京遣家人李德稱有詔封成功為海澄公勸其息  
民就撫 八月成功回廈門 九月大清兵攻潮州郝  
尚久求救成功遣陳六御率兵援之尚久疑不敢開城  
納兵未幾城破尚久死六御引兵還

甲午順治十一年 永歷八年

二月同安侯鄭芝龍復遣李德同鄭賈二使齎海澄公  
勅印招撫成功成功至安平鎮大宴二使辭以兵多將

廣無地安插不受勅二使回京復命乃就福興泉漳措  
餉汰富戶追納諸差官俱至各府縣城外屯扎但不入  
城耳計所追凡四百餘萬三月定西侯張名振忠靖  
伯陳輝師入長江奪戰船百餘艘入天津衛焚奪糧船  
百餘艘名振直至金山致祭烈皇帝而回金陵聞風震  
動四月執援勦前鎮黃大振絞殺之大振莆田人為  
黃斌卿舊將降於成功至是在興化措餉召募至數十  
人多不法有蜚語成功乃殺之五月常壽寧報餉餉  
黃愷逆汰橫行山海等餉多徵少解計十餘萬查實有

據成功以其衆怒遂殺之籍其家 九月中朝遣內院  
學士葉成格理事官阿山同成功弟內侍下渡舍蔭舍  
齋四府安插兵衆勅至 十九日李德周繼武先到肩  
門成功知先削髮後受詔只令周繼武特啟往請 二  
十四日葉成格阿山遣使到泉 十月成功發渡舍回  
泉復二使約至安平鎮開讀言先受詔而後削髮十七  
日二使到成功設供帳於報恩寺二使只就布棚安詔  
勅成功不肯受詔二十日二使回泉 二十九日二使  
促渡舍蔭舍并顏夫人回京復命撫事不成遂置鄭步

龍於高牆戍鄭芝豹於寧古塔 成功遣撫明侯林察  
閩安侯周瑞督水師戎旗鎮王秀奇左先鋒鎮蘇茂統  
陸師率五鎮營兵戰艦百餘艘南下差效用官林雲璘  
奉表詣廣并持書約西寧王同時大舉 十一月漳州  
千總劉國軒同魏標朴世用以總鎮張世耀新任兵將  
未協遣人約期獻城歸降成功遣洪旭甘輝林勝戴捷  
等於十二月初一夜直至南門掛雲梯國軒令人牽引  
而上張世耀倉卒不知所為乃降知府房星燧理刑王  
元衡知縣周瓊等俱降洪旭入城安輯初四日成功抵

漳以劉國軒為護衛後鎮魏標為火武營朴世用為水  
武營張世權軍前任用委戴捷鎮守長泰縣守將楊青  
來降諸屬縣皆下成功遣諸將徇泉州諸屬縣皆下之  
惟府城為副將韓尚亮堅守

乙未 順治十二年 永歷九年

正月初五日成功寇仙遊下之焚殺甚慘明兵部尚書  
唐顯悅之子乃成功姻家世子經之外父也亦死焉

二月成功設六官以潘庚宗為吏官洪旭為戶官鄭欽  
柱為禮官張光啟為兵官程璠為刑官馮澄世為工官



設協理各一員左右都事各二員以常壽寧為察言司  
掌六卿印鄧會張一彬為正副審理 設儲賢館以前  
所試諸生洪初闢揚經阮昊錫陳昌言陳鵬羽楊芳葉  
儒羽呂鼎陳繼明林復明及薦舉薛聯桂鄧愈等充之  
設育胄館以死事諸將及侯伯子弟林平林維榮充之  
成功改中左所為思明州以薛聯桂知州事 四月  
成功以郝文興為左提督萬理為後提督王秀奇為前  
右提督林勝代為戎旗鎮黃昌為後勦左鎮黃梧為前  
衝鎮 築兩州新城 五月總督南下林察周瑞王秀

奇蘇茂等班師回稱西寧王李定國戰敗退入梧州應  
擬不及成功怒甚降責有差 成功委戶官洪旭任水  
師右軍以吏官潘鍾庚兼管戶官加都管吳慎為協理  
佐之 成功以撫局不就分兵與張名振陳輝等會師  
入長江振其心腹以水師右軍洪旭為總督以原北鎮  
陳六御為五軍戎政總制六師率兵北上 中朝遣庶  
子王統率滿漢軍三萬入閩先撥前鋒滿騎到福省成  
功盡抽福興泉之兵回漳各屬縣城悉夷之為平地  
成功以儲賢育胄二館諸生監紀諸鎮營每月紀其功

罪彙冊上報設領兵中軍一員臨陣督戰以候缺將為  
之又設餉司一員後以監紀兼之 六月成功墮漳州  
城及各屬縣 成功合諸鎮兵於漳之南門外蓮花埔  
合操親自教演月終乃出兵 七月成功以中提督甘  
輝為正總督右提督王秀奇為副總督率二十餘鎮北  
上與忠振伯洪旭總制陳六御相機而行以前提督黃  
廷為正總督後提督萬禮為副總督率二十餘鎮南下  
八月前提督黃廷等入揭陽港扎營桃花山 我朝  
鎮劉伯祿率兵來援黃廷遂破走之擒其中軍斬級

無算 二十六日劉伯祿復合吳六奇及惠州之兵及  
營鷹嘴埔左戎鎮林勝揮兵渡濠直砍木柵攻破其營  
擒其副將諸鎮兵乘勢追殺遂入揭陽城忠勇侯陳豹  
自南潯以兵來會運火銃築土山攻之我守將知縣秦  
城遁去并取普寧縣追派各鄉寨納餉中提督甘輝等  
北上阻風就於温台二府打糧台州總鎮馬信欲降洪  
旭遣人招之風順遂進發舟山未果 九月左提督祥  
符伯敷文興病故成功親臨祭奠厚恤其家 庶子王  
至福州調集練旗馬步兵共進成功令思明州居民搬

移過海將士眷口搬住金門鎮海等處空島以待庶  
子王至泉州駐紮東嶽 十月成功調回戎旗鎮林勝  
守思明州 甘輝洪旭等至舟山由澇口江登岸守兵  
迎戰敗走遂進兵攻城總制陳六御遣監督李化龍入  
城招降我鎮守副將巴臣功等遂開誠投順張名振等  
出自長江來會我定關守將張鴻德棄家來附後授前  
鋒鎮 十一月成功差監督李長至舟山調兵北上師  
回以總制陳六御督定西侯張名振英義伯阮駿等鎮  
守舟山委林勝鎮守海澄縣王元士知縣事林其昌夫

入人罪革職 十二月廿輝引巴臣功等入見成功即  
授驍騎鎮改名臣興 洪旭入台州港馬信棄城帶兵  
馬妻子來歸成功即授中權鎮掛定北將軍印

丙申 順治十三年 永歷十年

正月我平南王尚可喜撥騎兵同潮鎮劉伯祿恢復揭  
陽離城西二十里扎營成功右先鋒蘇茂統五鎮守西  
門隔港據橋橋外即平埔時平南兵先以數百騎挑戰  
鎮兵追之即走是日援勦右鎮黃勝殿兵鎮林文燦左  
鎮黃梧在埔上操兵平南兵大至蘇茂欲出兵迎戰金

武營郭遂第諫以為橋狹難於退兵不聽及戰大敗惟  
遂第兵先過橋無一傷餘皆自相蹂踐擠橋渡港黃勝  
林文燦皆死於橋下甲士死者凡五千餘人大兵過橋  
折毀營盤直至城下前提督黃廷在東門出兵接戰我  
兵乃退報至成功命五軍總制張英再督戎旗鎮下湖  
大兵截港而營難於攻而各土堡皆堅守不納穀二  
月成功差兵官張光啟入揭陽察戰敗情形調蘇茂杜  
輝黃梧等回思明州令黃廷林勝及各鎮下廣採聽水  
陸信息 三月前軍定西侯張名振於正月病故令陳

六御兼管前軍事令水師前鎮阮駿專守山舟阮駿報  
定關造船五百隻欲攻舟山請撥兵防護成功遣馬信  
張鴻德督師北上協防 四月我庶子王調各澳船隻  
令泉州城守韓尚亮統眾出泉州港成功令諸鎮出圍  
頭外迎擊援勦左鎮王明以銃擊之忽沈尚亮船一隻  
信武營陳澤等乘勢追趕忽颶風大作諸鎮舟收泊圍  
頭尚亮舟被風壓下有飄入圍頭被獲者有漂入青嶼  
金門登岸乞降者有飄至外洋至廣海者得收回泉港  
者不滿十隻由是不敢渡海 五月黃廷等至碣石衛



兵士無糧逃亡皆盡遂回師 六月成功至思明州議  
揭陽喪師罪斬左先鋒蘇茂杜輝網責黃梧記責仍舊  
管事圖功自贖 以周全斌為左先鋒鎮全武營郭遂  
第改名華棟為後衝鎮撥黃梧守海澄縣 二十二日  
黃梧同副將蘇明據海澄降於我黃梧在揭陽亡其鐵  
甲兵二百餘名窘於賠補而廈門住屋又為鄭鴻逵所  
取故得揭眷而走蘇明乃蘇茂堂弟 世祖封黃梧為  
海澄公鎮潭州蘇明授精奇呢哈番召至京為內大臣  
後黃梧請發鄭氏祖墳株求鄭氏宗黨陷沒五大商漳

泉之民大遭其毒 成功令甘輝林勝洪旭等率各鎮  
兵攻復海澄縣 大兵已入城惟五都土城為副將林  
明領兵康熊所守遂搬米粟兵器下船計海澄城所貯  
貯糧二十五萬餘石軍器礮銃及各將領私蓄無算振  
林明為右戎鎮旗振康熊為左戎旗鎮領兵為中軍選  
兵官張光啟兵都事黃璋下獄以其附同黃梧瞞借楊  
琦衣甲軍器應點之罪又驚挾之致變故也 以黃元  
華棟守銅山時鎮將楊琦鍾守陳鵬等多不發為各監  
紀所揭被責甘輝上言以為文武不和乃聽諸監紀留

用 七月成功遣中提督甘輝林勝周全斌楊祖等十  
五鎮兵北上甘輝等遂入閩安鎮至福省南臺橋登岸  
扎營成功諜知省城無兵令取福州而差船失柁諭帖  
不至甘輝遂掠南臺潭尾等處 八月庶子王抽兵赴  
福州成功以前提督黃廷鎮思明州救張光啟黃璋黃  
罪管事躬率右戎旗鎮林明等至福州視師 是月浙  
江定關水軍攻舟山陳六御阮駿二船爭先奮擊 大  
兵誘之深入水急船不得回礮矢如雨俱赴海自焚而  
死餘船奔散 大兵入舟山遷徙居民折毀城郭張鵬

德亦戰沒 九月初三日成功至閩安鎮相度地勢令  
馮於世築寨城鎮守羅星塔亦築土城鎮守成功駕小  
駐壘江定海鳳埔等處中權鎮黃信自北回陳說舟山  
之事成功令優恤陳六御阮駿二家六御陳諫子也  
成功取連江縣守之 十月成功駐三都 初六日庶  
子王發兵攻銅山後衝鎮華棟護衛右鎮黃元合兵將  
擊之庶子王敗走成功以右提督王秀奇總督五軍成  
務中權鎮馬信管右提督事 十二月成功督師取羅  
源寧德等縣報入省庶子王遂撥滿洲梅勒章京柯格

商巴都柯如良等帶兵甲練旗兵數千赴援時同安侯  
鄭芝龍差謝表小八等力說就撫李率泰亦遣人來勸  
退兵以就撫苟成功令諸鎮兵皆退甘輝斷後至獲國  
嶺甘輝令抽兵過橋至崩下列陣馬信已撥兵下船顧  
謂甘輝曰吾聞公善戰今日親視公退此一陣也滿洲  
先鋒數百騎迨至見陣整不敢進甘輝再令抽兵度嶺  
親督數十人在後柯格商至甘輝揮兵欲殲之別將勸  
止甘輝曰此易取耳當盡殲之格商至嶺下身自下馬  
諸騎將皆步行上嶺前如雨發路狹兵不能成行甘輝

揮及大呼從高趨下海兵殊死鬪滿兵四奔柯格商中  
敗及猶力戰諸兵亂砍之馬信令斷其首埋於田中餘  
者殺死甚衆甘輝即下令收兵還營而別鎮追者為滿  
騎所殺退是役也柯格商最驍勇而已都柯如良等皆  
善戰及敗後滿兵為之奪氣於是撫事不成

丁酉 順治十四年 永歷十一年

正月成功駐三都 二月總制張英後提督萬禮等督  
舟師至溫州議攻金鄉衛我守將瞿永壽獻城降遂取  
糧而回 三月成功令萬禮督正兵鎮朝英左衝鎮洪

善右衝鎮楊朝棟等輪守萬安鎮羅星塔等處成功親  
率諸鎮北上至鎮下濶阻風遂回思明州初八日定國  
公鄭鴻逵卒於金門所 四月遣水師後鎮施舉同李  
順往浙江等處招集松門一帶漁民以為進長江嚮導  
施舉至定關遭風坐船流入港內 大兵攻之隔沒

五月六察常壽寧密啟戶官鄭泰乾沒洋船銀一萬查  
皆失實泰言此人必係奸細往往離間藩下左右用事  
之人不可信用又聞其受賄形狀成功大怒念其嵩江  
世胄一家四十餘口起義被殺兼年老免刑幽置而死

六月臺灣紅夷酋長揆一遣通事何斌送外國寶物  
張求通商願年輸餉五千兩箭杆十萬枝硫黃一千担  
許之 七月成功興師北上委忠振伯洪旭督水陸四  
鎮兵防守思明州初十日傳令在船開駕督戎旗等鎮  
進扎興化黃石分遣中提督甘輝進扎涵頭取糧三日  
遂抽進狼琦親往閩定鎮令前提督黃廷鎮守廷言閩  
安鎮不可守成功令守一月以護衛前鎮陳斌守羅星  
塔 八月十二日成功入海門港乘風直進黃巖縣戎  
守將王戎戰敗以城降 十八日成功進攻台州府令



馬信遣兵招降 二十六日我總鎮李必出城降知縣  
齊維藩臨海縣知縣黎獻唐俱降 九月太平縣天台  
縣守將俱降 初八日成功遣萬禮攻海門衛初九日  
成功親閱地勢頗險令監督宗繼寧入城招諭我守將  
張捷出降前所守將劉崇賢亦降永春義師林忠襲破  
永福縣我總督李率泰發兵進援檄海澄公黃梧兵未  
至疑之盡撥其轄下兵分入八旗黃梧大悔 李率泰  
調集漳泉水稍庶于王撥披甲下船圍羅星塔調集民  
夫自鼓山開路達鎮城十四日滿兵水陸齊攻成功前

提督右鎮余程守項寨戰死遂失閩安鎮護衛前鎮陳  
斌神器鎮盧謙守羅星塔被圍無援時施琅歸命為同  
安城守在總督軍前使人招降陳斌麾下兵皆欲降斌  
遂降後說李率泰盡殺之南臺橋凡五百餘人 成功  
恐閩安鎮有失撥兵赴援遂棄台州率師南下已無及  
矣遂以五軍陳堯策督數鎮守狼崎地方二十六日成  
功回思明州 二十八日成功督師南下 十一月初  
一日至南澳忠勇侯陳豹言惠潮破敗之餘得其城無  
用臨汀壩小寨令數鎮攻之可克左戎鎮林勝願自領

兵攻寨從之撤各提鎮於潮揭取糧成功回思明州  
提督黃廷林勝等攻破鷓汀壩時天旱涿乾兵至城下  
用人字牌遮身以鉄鑊鑿掘城牆列大煩齊發崩之而  
入男女無少長皆屠之壯士數百人走免其地遂空  
永歷遣彰平伯周金湯太監劉國柱航海至閩進成功  
為延平王晉封潮王成功欲破金陵然後稱王固辭不  
受文書告示以稱令旨而已後金湯復命雲南已破死  
於廣海前監國魯王科臣徐孚遠附海船至交趾欲假  
道歸永歷交趾王欲兵以臣禮朝見孚遠不肯登岸而

回成功遂禁商船不許往廣南貿易

戊戌順治十五年

永歷十二年是歲永歷亡海上稱其年號

正月成功駐思明州

二月成功調集各提鎮挑選勇

健者撥入親軍

三月成功築演武亭於廈門港練兵

以石獅重五百斤者為最力能挺起者撥入武衛虎衛

親軍皆配雲南斬馬刀弓箭戴鐵面穿鐵臂鐵屨用鏢

鏢定使不得脫時謂之鐵人 拔陳魁陳鵬為左右虎

衛鎮成功令左武律林勝合左右虎衛之兵南下攻許

龍港水忽漲舟師直入許龍率眾而逃護其輜重米粟

船隻焚其巢穴 我海澄守將劉進忠等率兵獻城迎  
降後衝鎮華棟病故以劉進忠管鎮事華棟即金璣弟  
興化府諸生也舉義其母尚繫府獄故改名後成功以  
千金贖出之仍卹其子 五月以前提督黃廷防守思  
明州與兵官洪旭同商機務戶官鄭泰給發兵餉餘諸  
提鎮俱從行甲士五萬習流五萬習馬五千戈船八十  
鐵人八千伏兵七十餘萬舟數千艘 六月初七日師  
至平陽縣我守將車任暹獻城降 十三日瑞安縣守  
將艾誠祥降 成功鐵騎鎮巴臣興病故以黑雲祥管

鎮事 十六日成功至溫州我鎮將堅守不出成功議  
取糧足餉收兵下船 七月初二日成功開駕抵舟山  
問引港官李順水程順曰舟山至洋山西南風一日便  
到其山皆羊無人住有大王廟甚靈海中有矇瞽二龍  
泊船不可金鼓獻紙恐其驚動翻覆不安成功不信初  
九日午刻到羊山候艖初十日各提鎮來見放炮鳴鑼  
不移時風起浪湧迅電閃電對面昏黑不相見但聞呼  
救之聲管船都陳德與太監張忠等跪求成功上柵拜  
天拜甫畢風雨方息波浪稍恬覆舟五十餘號溺死數

千人成功大中軍船打破失六妃嬪及幼子六人亦溺  
馬死者凡二百三十一人 十四日成功以兵船軍器  
損失回至舟山議向溫台各港取糧 九月初十日成  
功至象山縣知縣徐某遣生員父老送牛酒犒師并具  
稟啓成功遂傳令不攻時北兵驚怕風浪多逃去有能  
援勦右鎮賀世明等船頭梳俱扮紅又訛傳欲叛去并  
北將盡失之語成功遂撤賀世明鎮任并令張五軍諭  
水武營卜世用火武營魏標中權鎮李必奇兵鎮張魁  
等解職惟北鎮姚國泰補援勦右鎮賀世明情激氣死

以總理監營翁天祐署左提督隸其兵 十月初二日  
成功至台州港後衝鎮劉進忠走入海門所成功令棄  
城而走以水武營黃招管後衝鎮 二十二日成功至  
磐石衛守將不降下令攻城 十一月初七日城破擒  
斬無數 十二日成功分各提鎮就汎地養兵 十二  
月成功駕駐沙關 是歲大清兵破雲南永歷亡先是  
秦王孫可望出湖南與經畧洪承疇對壘永歷駐安龍  
所西寧王李定國奉之以入雲南一路無阻遂將孫可  
望家眷送之軍中遂之途中輜重又被劫掠可望窮情



邊投誠至京 世祖優待之封義王其死也親吊之平  
西王吳三桂與內院洪承疇邊攻入雲南李定國護永  
歷至緬甸病死吳三桂追之緬人懼獻永歷疏聞築臺  
絞死是日天地昏暗有白龍昇天之異觀者莫不傷感  
而明祚至是終矣